



Viola Cadruvi

Ausschnitt aus *Panuglias da fim*

Mentorin: Bettina Vital

Benedetg sa lavura plaunsieu da stgala giu. Tar l'emprima auzada reprenda el il flad e guarda da fanestra ora. Ils bancs ordaifer s'emplainan gia plaunsieu, tge che munta che l'emprima chargia dal lift è arrivada giun plaunterren. Forsa ch'el avess tuttina meglier prendì quella via. Ma ussa èsi memia tard. El ballucca vinavant, in maun adina sin il tschabargal. Sin plaunterren na fa el nagina pausa, dentant sin il pitschen plaun tranter terren e tschaler. El sgnufla. Fin ussa n'ha el entupà nagin'olma qua sin las stgalas. Qua pudess jau murir e nagin sa percurschess, pensa el. Fin che la spizza s'auzass en il plaunterren ed avanzess tar la recepziun. Grazia a ses stadi igienic giess quai forsa perfin in pau pli spert che normalmain. Probabel ha ses smarschir intern gia cumenzà, cun quai ch'el n'ha gia talmain ditg betg pli fatg la duscha. El pendulescha tranter fascinaziun e disgust. In zichel al disturba quest patratg dal smarschir intern schon e curt considerescha el da tuttina laschar far la duscha oz suentermezdi. Ma lura pensa el puspè pertge ch'el è insumma qua, ed il fatg che la duscha avess da capitar cun l'agid da dunna Mala al lascha sbittar il patratg.

El sa metta a prender la via sut ils pes dals davos meters fin giun tschaler e spera ch'el na perdia betg anc la ballantscha durant quels ultims pass. Giun tschaler stat el davant in proxim isch. El prenda ensemen tut sia forza e stgarpa vi dal capugl. Nagut. Ha el ussa fatg l'entira expediziun per nagut? El sa platga plaunsieu per intercurir il manetsch. La spina dal dies scruscha.

El vesa ina fora-clav. Speranza n'è l'isch betg serrà giu. Anc ina giada squassa el vi dal capugl. Oha! El sa lai turnar. E guarda qua, l'isch s'avra tgunschamain. El entra e fa in pèr pass en il pastrign. Nagin na para dad esser qua. Duas maschinas da lavar vestgadira curran per sasez. A sanestra sa rechatta

double

in grond chanaster sut in vau ord il palantschieu. Cun mirveglias guarda el en il chanaster. Vestgadira, l'odur fa sminar ch'ella è tschuffa. Ma tge è quest vau? El guarda ensi ed en quest mument survegn el la risposta. In entira fulla da vestgadira, blusas, chamischas, soccas, chautschas suten e chamischuts crodan ad el en fatscha. «Buah, buah, buah», fa el ed emprova da sa deliberar da quest'attatga materiala. En quest mument auda el in sbratg da dretg. «Fantazmë, fantazmë!», sbragia la vusch. Benedetg sa scurlatta ed emprova da trair davent ina chamischa spizzalenta da ses chau. Lura auda el ina segunda vusch pli calma che para da rir. «Hallo», fa el pia cura ch'el ha puspè vista clera. Avant el stattan duas spulvrettas, ina anc adina cun ina egliada tut confusa, probabelmain quella ch'aveva sbragi, tschella plitost divertida.

Ellas na dian nagut. «Ich suche etwas», di Benedetg. Anc adina nagina reacziun. La spulvretta confusa vesa ora malsegira. El sa drizza si anc in zichel, emprova da sa mussar en tut la grondezza ch'el aveva pli baud. Quellas stoda spulvrettas, pensa el. Forsa ch'ellas han propi engulà sia stgatletta. Quella era gea dad argient e veseva era ora in zichel custaivel. E questas duas dunnas qua parevan da vegnir insanua da l'ost, u forsà era da la Jugoslavia. El las guarda cun disfidanza. «Eine silberne Zigarettenschachtel, haben Sie sie gesehen?» La dunna divertida sfrigna puspè. «Nus n'avain vesì nagina stgatletta», respunda ella. Benedetg fa gronds eglis. Ina rumantscha. Ussa scrolla era la dunna speras il chau. «Jau n'hai era vesì nagut», di lezza. Ussa è Benedetg pir da dretg perplex. «Mo, mo», fa el. Ma tuttina. Mo perquai ch'insatgi discorra rumantsch, n'è quella persuna gea betg innocenta. «Segir?», di el. «Ella è svanida or da mia stanza durant ch'jau sun stà ad ensolver.»



Alle Rechte vorbehalten.

Dieser Text entstand im Rahmen der Mentorats- und Coachingplattform Double des Migros-Kulturprozent.

www.double-mentoring.ch